

paré de rigoureuses peines. O vous qui estes sages, craignez Dieu, il vous a enuoyé l'Alcoran, il vous a enuoyé vn Prophete pour vous enseigner les misteres de sa loy, pour vous sortir des tenebres, & pour conduire à la lumiere ceux qui croiront en luy & qui feront de bonnes œuures; il leur ouurira la porte du Paradis où coulent plusieurs fleuves, où ils demeureront eternellement avec toute sorte de contentement. Dieu! C'est luy qui a crée sept Cieux & autant de terre, & il ordōne entre eux ce que bon luy semble, afin que vous cognoissiez qu'il est tout puissant & qu'il sçait tout.

LE CHAPITRE DE LA DEF-
fence, contenant douze versets, escrit
à la Medine.

AV Nom de Dieu clement & misericordieux. O Prophete ne deffend pas pour le contentement de tes femmes, de faire ce que Dieu t'a permis, il est clement & misericordieux; il vous a ordonné de faire ce qui est permis par vostre loy, il est vostre Seigneur. Il sçait tout & est tres-sage. Lors que le Prophete est allé visiter vne de ses femmes, Dieu luy a reuelé ce qu'elle luy vouloit dire, il en a approuué vne partie & en a desapprouué l'autre, lors qu'il a dit à sa femme ce qu'elle auoit volonté de luy dire, elle luy a

demandé qui luy auoit reuelé ; Celuy qui sçait tout me l'a reuelé , afin que vous vous conuertissiez , vos cœurs sont enclins à faire ce qui est deffendu , si vous faites quelque chose contre le Prophete, sçachez que Dieu est son protecteur, l'Ange Gabriel & tous les fidelles le deffendront, les Anges le protegeront contre vous; S'il vous veut repudier, Dieu luy donnera à l'aduenir d'autres femmes en vostre place qui seront obeyssantes, vray croiantes, humbles, fidelles, deuotes, contentes, douces, nettes, pucelles & non pucelles. O vous qui croyez en Dieu, fortifiés vous & vos familles en l'obeyssance de ses commandemens, les Idolatres brusseront dedans le feu d'Enfer avec leurs Idoles, les Anges deputez pour les punir ne desobeyssent pas à Dieu, ils font tout ce qu'il leur commande. O vous qui estes infidelles il n'y a point d'excuse pour vous, vous serez chastiez selon vos demerites. O vous qui croyez, conuertissez vous à Dieu avec affection, il vous pardonnera vos pechez, & vous fera entrer dans des iardins où coulent plusieurs fleues, la lumiere de la foy marchera deuant le Prophete & deuant ceux qui l'ont suiuy; Lors que Dieu les recompensera; Ils diront, Seigneur, donne nous ta lumiere, pardonne nous nos pechez, tu es tout-Puissant. O Prophete cōbats les infidelles & les impies, fortifie toy contre eux, l'Enfer sera leur habitation. Dieu enseigne vne parabole aux infidelles, & dict ; les femmes de Noë & les femmes de Loth estoient sous le pouuoir de mes deux seruiteurs

hommes de bien, elles les ont trahis, mais elles n'ont pas euité la punition de leur peché; on leur a dit entrez dedans le feu d'Enfer avec ceux qui y entrent. Dieu enseigne vne parabole à ceux qui ensuiuent sa loy, prenés exemple à la femme de Pharaon, elle a prié Dieu & a dit, Seigneur basty moy vne maison en Paradis, deliure moy de Pharaon, de ses œuures, & des personnes iniustes. Marie fille de Iosaphat a conserué sa virginité, nous auons inspiré nostre esprit en elle, elle a creu aux paroles de son Seigneur & aux escriptures; elle estoit au nombre de celles qui obeysoient.

LE CHAPITRE DE L'EMPIRE,
contenant trente versets,
escrit à la Meque.

AV nom de Dieu clement & misericordieux. Louéz soit celuy auquel appartient l'Empire du monde, qui est tout-Puissant, & qui a créé la mort & la vie pour vous faire cognoistre quelle est la meilleure, il est tout-Puissant & misericordieux. Il a créé sept Cieux l'un sur l'autre, tu ne vois rien de ce qu'il a créé qui ne soit proportionné, eleue encore ta veüe au Ciel, tu n'y verras point de deffaut, regarde le deux ou plusieurs fois, tu n'y verras point de fente ny de manquement. Nous auons orné le Ciel & le monde d'E-